

OMUKWE TU



50c

No. 19

ISBN 0-620-06828-0

Aasita yoonzi dhomuupongekwa ya kundwa kewiliko lyOngeleki

Elelongeleki lyeti 13-15.9.1989 olya tsakanena nolya kunda pambelwa aanashilonga yayo mboka ya longa oshilonga shopambepo mokati kiilyo yomagongalo gOongeleki dhomuNamibia manga ya li muupongekwa pondje yoshilongo.

Omuyevangeliste Josua Nghatanga Kongo, omuyevangeliste Mikael Amukoto Tshandi, omusita Lukas Nantanga Ekamba, ngoka a yapulilwa oshilonga shuusita pondje yoshilongo sho a tumwa kongundu yoSWAPO kosikola yuusita osho wo omuyevangeliste Theofilus Amwaama Onangalo, ngoka naye ongundu ye mu pele ompito yokwiilonga uusita, oyo ya litha oshigunda shoonzi muupongekwa.

Mokuulika nkene ya longo mokati kiilyo yomaitaalo ga yooloka, Aakatoolika, Aayanglikana nenge Aayevangeli, aanashilonga mbaka oya ti, yo kaya li ya mangwa komulandu gwOongeleki yontumba, ihe oshilonga shoka oye shi longo ngaashi hashi ningwa pokati komalongelokumwe gomaitaalo inaaga faathana (Ecumene). Shoka otwe shi ningi komukanka gwovelise 12 mEvangeli paJohannes ontopolwa 17, osho ya hempulula.

Ondjuulukwe yopakriste maapongekwa mbeyaka aahokololi, oya ti kutya oya li tayi iholola sho taa kongo eshasho, taa ikolekitha, taa yambekitha oondjokana dhawo paukriste notaa yapulitha oombila dhawo. Aanashilonga oyu ulika nepandulo komakwatho omanene ya ti oye ga pewa kooitaali yomuuyuni, nonando ya kala



Omunaaveta Anton Lubowski, oshilyo shoSWAPO ngoka a dhipagwa 12.9.1989 mOvenduka. Okwa ningi omuntu shike.

muundjendi mu na oompumbwe oonene.

MOSHIGONGI SHESIKU LIMWE



Omumbisofi ta popitha oshigongi shaasita shopaulumompumbwe, mOniipa. Tala kep. 2

Oshilongayakulo shoka okwa tiwa osha tumi-nwa Oombimbeli 588. KuNdowishilanda lyuuningininino okwa zile iihauto iyali okukwatha moshilonga shoka, osho wo Ehangano lyolyene lyaSWAPO oya gandja oshihauto shimwe shi mangulukile iilonga yopambepo.

Oshilonga osha kala wo nomaupyakadhi gasho, osho sha yelithwa kaayakulingeleki mboka va galuka notaa hambelele egameno lyoonkonoo dhaKalunga okuhupitha aantu. Oya ti kutya omutondi gwoshigwana shaNamibia, ina kondjitha ashike ongundu ta pitile miinima yopapolitika, ihe okwa kala wo ta kambadhala nokupitila miinima yopambepo.

Mokwaadha elalakano ndyoka, ehokololo otali ti kutya omutondi okwa kala ta tumu aapukithi ya shundule uukriste mokati kOngundu noku u sheka, talike konokutya SWAPO kee na sha nuukriste. Komukalo nguka Oongeleki muuyuni, unene Ongongahangano yAakwaluther ndjoka ya kala omutopoli gwoompumbwe oonene dhongundu, otayi hulitha po ekwatho lyayo.

Aalongithwa yomutondi inaa sindana nande moshinima shoka, SWAPO yoshili, otayi popile uukriste notayi u lalakanene. Nujoma okwa sindi omamakelo ogendji sigo aatondi ya mono kutya ongundu otayi kondjele oshili nuuyuuki, osho sha pulakenwa momakana goonzapo dha li mekondjo pamwe noshigwana.

Sebulon Ekandjo

KOTOKA 15, 1989

Oshinyenga tuu Namibia li itale oshigwana shimwe ngaashi igwana iikwawo muuyuni?

Osha pumba miigwana yilwe u mone oshigwana shu uka ngeyi kuuketha wehogololo ngaashi shetu shu uka ko muNovomba, ihe oshi itopagula mungundu u vule omulongo nokuli. Iigwana muuyuni oyindji yomuyo, oyi tu vule owindji waantu noyi shi okwiimanga kumwe. MuNamibia tse okamaalu okashonalela, ihe otu yi vule okwiitopagula muungundu pamihoko nokuli.

Ehogololo hali ningwa miigwana oyindji muuyuni, moka oongundu mbali adhike nenge ngele odhindji ndatu tadhi kutha oshitopolwa mehogololo, ohadhi hogolola pokati komulandu gwongundu ndjika nenge ndjiyaka mevi lya mangeluka. Tse ehogololo tu uka kulyo, kali li ngeyi aawe. Lyetu otatu ka hogolola pokati kuukoloni neipangelo lyoshigwana.

Ngoka inaa hala uukoloni, ta kutha eipangelo, nenge ngoka inaa hala eipangelo, ta kutha uukoloni. Ngele oshi li ngeyi, ihe otu uka kuuketha wehogololo twi itopola muungundu u vule omulongo, otashi vuli shi gandje euveko muuyuni wopondje, kutya Aanamibia aantu mboka ye na omagano gokukondjela uukoloni.

Ohole yetu yuukoloni oyo ye tu ningitha ano tu hugunine mokukolonyekwa muAfrica? Ongeleki oye shi itaala kutya mowindji wuungundu tau yi kehogololo, kamu na nando elago lyonakuyiwa yoshilongo, ihe oshinima tashi pendula oshimpwiyu moomwenyo dhaaholimbili.

Otashi nyenge tuu Namibia mehogololo ndika okwiitala kutya ye oshigwana shimwe ashike, noku na elalakano limwe alike, okuteya po ondjoko yomukolonyeki, opo ihe konima omuntu a hogolole omadhiladhi longundu ngoka ta landula? Shika osho Ongeleki ya hala okugalikanena methimbo ndika.

Sebulon Ekandjo

Aasita yoonzi dhomuupongekwa ya kundwa kewiliko lyOngeleki

Aasita ye vule kashona ethele limwe yomOngeleki Onkwaevangeli paLuther yomuSuidwes-Afrika/Namibia (ELCIN), oya li yi ithanwa kewiliko lyOngeleki momutumba gwesiku limwe 20.9.1989 mOniipa. Oshigongi oshopaulumompumbwe nosha li shi na omalalakano gopaali:

1. Okukundathana koshikundathanwa shethimbo ele mOngeleki, nkene Ongeleki ndjika tayi vulu okutendwa miikandjongeleki, noongamba mpoka iikandjo mbyoka tayi tameke notayi huile.

2. Okukundathana eyakulo lyopaNgeleki nkene li na okulungwa monkalo ndjoka yu uka momalunduluko gopapolitika.

Okuza 1984, Ongeleki oya tokola miigongi yayo okutenda iikandjo yopaumbisofi, opo shi gandje uupu weyakulo kaawiliki yOngeleki. Oongamba dhiikandjongeleki mbyoka odha kala oshinima oshidhigu okutokola pokati kiitayingeleki ine mbyoka yi li po nale.

Omolvoshigongingeleki nuumvo muDesemba shopaulumompumbwe, moka oongamba dhiikandjo dhi na okukundathanwa, aasita 105 oya kala momutumba gwoshigongi shesiku limwe okugandja omadhiladhilo gawo moshinima shoka.

Oshigongi osha li wo sha kundu aasita mboka ya yakula Aanamibia muupongekwa. Omusita Lukas Nantanga; omusita Natanael Nghatanga; omuyevangeliste Mikael Amukoto, nomusita Erastus Haikali (Katalala). Nguka gwahuguni na ogwOngeleki yaAnglikana.


Konima yokugandja ekundo lyawo, ndyoka lya kwatelela mo okusimaneka oonkondo dhaKalungadhegamenomomakuti moka ya kala noshipala sheyakulo lyopakriste mookamba moka ya longo, omapulo oga tameke okuloka ngaashi ompawe, taga zi maasita mboka ya adhika mpaka momagongalo.

Shoka sha zi mekundo lyaanashilonga mbaka ya longo muupongekwa nomayamukulo ngoka ya gandja komapulo ge ya po, ashihe oshu ulike onkambadhala yawo yokulonga moshili nopauyuuki nonando oya kala mokuti. "Otwakala neitaalo kutya onatu galuka, onkene ka twa li twa hala oku mu etela omikundu," osho ya popi neifupipiko.

Aayenda yaali ya simana oya li wo ya kala momutumba gwoshigongi noye shi kundu. Oyo omunaveta Ralston Deffenbaugh, ngoka i ithanwa kOngeleki muNamibia okukwatha miinima yopaveta pethimbo lyetulomiilonga lyokatokolitho. Osho wo omusamane Justin Elis, gwaAnglikana, ngoka a tidhilwe muka kepangelo lya SA konima yomimvo 14 dha piti.

Opwa dhimbululwa natango ompumbwe moshigongi shika okugongala ishewe nokutaasina kiikundathanwa mbyoka ya hupu ko.

Sebulon Ekandjo



Aasita yoonzi dhomuupongekwa. Okuza kolumoho Erastus Haikali (Katalala) Lukas Nantanga; Natanael Nghatanga nomuyevangeliste Mikael Amukoto.

Aayakulwa amuhe aasimanekwa, mboka twa kala hatu yakula mpaka naamboka mwa hala tu mu yakule komeho, miinima yokunyanyangilwa ongele omambo, uukalata, iifo niikwao yilwe, otatu mu tseyithile notatu mu indile neindilo lya sheywa, opo mu tale moosikopa dheni dhokupungula iilongitho veni yi na sha nomambo, ngele omu na tuu omambo nenge uukalata nomakutu mbyoka mu wete otayi mu pititha sigo okomumvo tagu ya.

Omumvo gwonuumvo ngaashi atuhe twe gu tala notwe gu moneni ogu udha iilonga oyindji. Onkee tatu mu indile nesimaneko ngoka u wete wa mana po omambo gove, nowa pumbwa okunyanyangidhilwa galwe, u tume mbala embesitelo lyoye manga kuyele, opo tu tale ngele tatu li pititha tuu manga kuyele. Ngaashi shito nonuumvo otu na wo efudho muDesemba.

Tangi sho tu shi shi nokutya otamu taamba ko eindilo ndika nando olva ta lya tokelwa kashona.

Oshinyanyangidho
Oniipa

ELIKO LYOKOMBANDA YEVI

Eliki lyokombanda yevi olyo oshikwiila shesiku kehe ngaashi hatu shi tumbula mEgalikano lyOmuwa. Iikulya niinima ayihe mbyoka twa pumbwa palutu manga tu li muuyuni muka, oyo ngaa eliko kombanda yevi. Eliki ndika olyo tali lukwa Mammon mOmbimbeli. Pambimbeli eliko lyokombanda yevi otali talwa eliko lyiifundja, sha tashi vulu okumbembeleka omwenyo gwomuntu (Luk 16:11).

Ombimbeli otayi holola kutya uukwashilongo wooitaali yaJesus kau shi womuuyuni muka, ihe owomegulu. (Fil 3:20), onkee eliko lyokombanda yevi, eliko lyokiilongo, eliko lyaantu, omuntu to li thigi po u ka adhe eliko lyaandjeni megulu (Luk 16:12).

Eliki ndika ngaashi tali tiwa mammona ohali manga omwenyo gwomuntu nohashi zi omamkelo. Eliki lyokombanda yevi ihali kutiwa nohashi pendulile aantu okahalu nuufukedhi wokulikola. Okahalu keliko ohaka penduthile omuntu ombepo yokuhalu eliko lye li indjipale, nongele omuntu ina kotokela ombepo ndjika nuuna nduno eliko lye li indjipala, omuntu oha nyengwa oku shi mona.

Okahalu keliko oha ka zi ombepo yokwiihola. Aantu oyendji omolwokwiihola kwokulikola oya ningi aakotokeli, aanyokomi, aafuthi naayugi yooyakwawo. Ombimbeli otayi ti, uuyuuki owo eliko enene shili, ihe ongele omwenyo gwomuntu gwa gwana neliko ndyoka e na.

Ngele omwenyo gwomuntu otagu pangelwa kokahalu keliko, omuntu ota gwile miilonga iiwinayi yokutanitha eliko lye nota puka mo mondjila yeitaalo nota kanitha uuyuuki we (1 Tim 6:9-10).

Otekesti yOsoondaha onti 13 ya landula Uukwatatu oya kuthwa mu Mat 6:19-24. Otekesti ndjika oyi na ekumagidho tali ti: "Inamu ilikolela omaliko kombanda yevi, ihe ilikoleleni omaliko megulu." Eliki lyokombanda yevi kali na uukolele washa. Ohali tuuka. Ohali tatuka. Ohali lika kuuha. Ohali ningi iikogo. Ohali tukwa. Ohali yakwa po.

Eliki lyokombanda yevi ohali thigi po omuntu nenge li thigwe po komuntu. Eliki lyomegulu olya kola nolyaaluhle nolyo ndyoka Jesus a hala li lalakanenwe kooitaali ye. Moohapu ndhika Jesus ite tu nyanyalitha okulikola, ihe ote tu kotodha oomwenyo dhetu dhaa pikwe kohole yeliko lyokombanda yevi. Ngaashi naanaa okulongela Kalunga taku pula omwenyo aguhe gwomuntu, oshowo okwiipakidhila neliko oha ku manga omwenyo aguhe gwomuntu.

"Hoka ku na eliko lyoye oko ku na omwenyo gwoye," osho Jesus ta londodha. Jesus ota pula omwiitaali kehe a simaneke okulongela Kalunga nokulikola elago lyomegulu komeho giinima yomuuyuni muka. Omuntu ngoka a likola omwenyo gwaaluhe oye e na eliko lyashili tali kalelele. Eliki lyokombanda yevi otali ka hula po pamwe nuuyuni mbuka naamboka taa ka adhika ye na oomwenyo dha mangwa kulyo otaa ka hula po wo pamwe nalyo.

Ooitaali oye na okudhina esimano lyeliko lyomuuyuni mbuka nokusimaneka eliko lyomegulu. Ohapu yaKalunga otayi ti: "Kongeni oshilongo shaKalunga, naambyoka otamu yi gwedhelwa po (Luk 12:31)."

Eliki lyokombanda yevi olyo omagano hatu ga pewa kuKalunga notu na oku li taamba noku mu hambelela (Tim 4:4). Ihe nando ongawo ohapu dhevangeli otadhi kumagidha omuntu waa tule omwenyo gwoye mulyo e to dhini Kalunga niinima yoshilongo she. Mu Luk. 18:23 otaku hokololwa omuyamba a nyengwa okulandula Jesus molwohole yeliko lye nande okwa hala okuthigulula omwenyo gwaaluhe. Okwa ekelehi edhiladhilo lyokuninga omulanduli gwaJesus opo a kalele eliko lye. Eihumbato lyomuyamba nguka otali tu kwatha okuuvako nawa elondodho lyaJesus sho ta ti: "Kamu vulu okungela Kalunga nannammona (Mat 6:24)."

Mokukala neliko lyokombanda yevi omukriste ota pulwa etilokalunga, oshoka etilokalunga ngele li li po, nena omuntu ota vulu okulongitha eliko lye mokusimanekitha edhina lyaKalunga. Eliki oli na okulongithwa mokulikolela Kalunga ongundu yooitaali noyaahupithwa (Luk 16:9). Mu 1 Tim 6:17-19 aayamba otaa kumagidhwa yaa inekele noomwenyo dhawo muuyamba inau kola, ihe ya kale haa topola nohaa gandja meliko lyawo opo yi imonene omwenyo gwashili.

Okukwatha aantu neliko lyoye osho iilonga iwanawa koshipala shaKalunga. Aantu oyendji ya ningwa ooitaali naatilikalunga sha zi owala momakwatho nomomayakulo gooyakwawo. (2 Kor 9:12). Payuni aantu ohatu kwathathana ngaa, ihe ombepo yuutondwe nuuluya ohayi pangele moomwenyo dhaantu. Omagadhi ihaga lilwa peke lyamukweni kokutya, mokutegelela omakwatho kooyakweni ino tegelela ye ku gwani-thile po oompumbwe dhoye adhihe ngaashi wa hala, ihe kondja wo mwene mokwiikwatha.

Oipango 10 yaKalunga

Kalunga okwa yandja oipango yaye 10, e i pe Moses kondudu yaSinai e i ete kovanhu vaye 2Mos 31:18. Omunhu keshe tuu, omuhoko noludi keshe ota teelwa a diinine oipango yaKalunga e i diinina paenghedi mbali.

- E i lilonge momutwe, a kale e i shi.
- A wanife eshi a lombwelwa koipango.

Apa otapa landula eetekisti edi tadi tu kumaidile okudiinina oipango yaKalunga, 5Mos 4:40. Nafye yo Ovanamibia ohatu teelweni tu diinineni oipango yaKalunga, ye e tu pe edu li na olupuna u lili nau lili, 5Mos 6:6-13.

Oinima yetu aische otai nangekwa nouputa kuTate Kalunga. Ngaashi oinima, eengobe otadi kala nomutunda, Ps. 144: 13. Osho yo oikombo eenghombwena olwawa longaho noikulya kupula, oiimati eembe neenghiyu osha mbeleta aperse opo, noiimati i lili nai lili, inandi tumbula komadina ayo. 5Mos 7:11-14.

Ovanhu otava ka hapupala yo. Ovangabeki novangabekwa vomaludalo nye efeni ovanhu vaKalunga va hapupale, tamu nyono eyambeko laKalunga, neufu laye, 1Mos 9:7 naJer 29:6. Diinina oipango yaKalunga 5Mos 8:11, 27:1-10, Joh 15:10, 1Joh 2:3-4, Rom 7:7;9-14.

Mat. 6:19-24



Ohapu yaKalunga kombinga yokukwathathana otayi pula aantu ye shi ninge omwenyo aguhe, oshoka omuyamba ota pulwa a kwathe ohepele sigo tayi ningi wo omuyamba etapu holoka efaathano (2 Kor 8: 13-14). Uuyuni waayamba inaa vulika keyele ndika lyomuyapostoli, oshoka koombinga noombinga dhuuyuni otaku monika aantu ye li momaluhepo omanene natango.

Eliki lyokombanda yevi olyo wo ndyoka Kalunga a tegelela tu li mu etele omapandulo opo iilonga yoshilongo she yi vule okulongwa kombanda yevi. Iilonga yegongalo nenge yongeleki oya kankamekwa keliko lyoye. Ngele oho li gandja nomwenyo aguhe otayi humu komeho nawa, ihe ngele oho li ngungunine otayi humu komeho nuunkundi.

Oomwenyo dhooitaali nadhi manguluke ano kokahalu keliko tse tu longe uuyuuki nuwanawa niinima ayihe mbyoka Kalunga te tu yambeke nayo.

E. Niinkoti Nakayale.

Oulunde owa kala momunhu a he u wete. Oipango oyo ya hololele omunhu oulunde. Ondwi ngeenge i li poshini, ile nongulu, oha kala ya mwena ya nangala, nohai tukululwa mo ne kolukateko ngeenge tamu kombwa, notai kala nee i wetike. Osho oulunde wa nangala momunhu notau tukululwa mo nee koipango notau kala nee u wetike.

Noulunde wa hololwa koipango otau dimwapo keshasho nokohonde yOmwene wetu Jesus. Nale paTestamendi likulu ou a nyono oshipango shaKalunga keshe, oha dipawa nomamanya. Apa pa dja elaka tali ti: Ondjabi youlunde oyo efyo, Rom 6:23 2Kor 3:6.

Apa nandi ulike eendjovo odo tadi popi onakudiwa ava va nyona oipango. Tu taleni okudja koshipango shotete fiyo okoshiti 10.

OSHIPANGO SHOTETE

Ovanhu e shi va mona kutya Moses okwa kala ko, ina dja ko komhunda, ovanhu ova ongala puAron ndee tava ti kuye: Fikama u tu ningile ookalunga ava tave tu kwatele komesho, osheshi inatu shiiva oshike sha hanga Moses.... Ex 32 1-10 Deut 13:6-16, 11:16-17.

Tala kep. 5

ONDA HILWA KUUTOYE WAAMPOKA NDA KALA TANGO: EMILIA

“Pehala mpoka nda tameke iilonga mOngeleki opo pwa zile ndje uutoye wa hili ndje ndi indile okutaambwelwa mosikola yOngeleki, osho omulongwapangi Emilia Akweenda a yamukula kepulo lyOmukwetu, kutya omolwashike eindilo lye e liukitha kosikolayOngeleki”.

Meme Emilia ngoka ta kondjo niilongwa yomumvo gwtango numvo mosikola yoshipangelo shOngeleki mOnandjokwe, okwa longo konyala omimvo hamano pombelewa-ngeleki pOniipa, tango mOngalashye yOngeleki, opo lwahugunina mombelewa yooProjeka yOngeleki.

Omumvo 1989 kagu shi ashike gwtango kuye miilongwa yuunamiti, ihe ogwo wo gwtango kuye okukala moondjokana. “Onda li nda hokwa tuu andola uulongi okuza muunona wandje, onkene tuu eindilo lya-ndje lyotangotango 1980, onde li ukitha kosikola yuupangi, kandi shiwo omolwashike. Kalya li lya pita omumvo gwiwaka”.

Omumvo 1982 ogwo meme Emilia, nale yaKasita, a taambelwa mokambeleva okashona kOngalashye yOngeleki pOniipa, sigo 1986 sho iilonga mbyoka ya patwa. Sho a yakula oomwedhi mombelewa onene natango yOngalashye tuu ndjoka, okwa langekwa ihe mombelewa yooProjeka. Omimvo dhokoni-ma a dhangoloka noombelewa pOniipa, meme Emilia ote dhi dhimbulukwa nepandulo enene.

“Ondi ilongela po oshindjilela,” osho a tumbula ti imemeha. Onda tseya okutula oondjele dhoondando, kiipindi moongeshefa, onda tseya okuyalula embo lyiimaliwa okutala ekanitho nelikolo, onda tseya okutopatopa, onda tseya okulungekidha omunasikola a monenwe iimaliwa yuunasikola nenge ohokwe yoyene meihumitho komeho omo nde yi monena meyakulo ndyoka”, osho e shi popi nepandulo.

Omulongwapangi Emilia, oomvula dha zi ko okwa longo niinima yomaindilo gaailongi okumononwa iimaliwa mombelewa yooProjeka, tango mewiliko lyomusamane Immanuel lithete, opo ishewe lyomusita Set Son Shivute. Ehulitho lyembo sho e etha iilonga mbika, a ka tsikile kuupangi, ota ti opo e li mana muAguste gwa zi ko, oshoka kakwa li a mona ompito yoku li longekidha petameko lyomumvo omolwetaambwo lye kosikola.

“Onda kala he kongo omafudho gowina ndi ye ndi opalake ombelewa yandje sigo Kalunga a kwatha ndje, nda mana. Onde shi ningi nenyanyu, sho te yakula Ongeleki yandje”, osho a yelitha pOmukwetu. Kombinga yomanyenyeto haga uvika moshigwana, kutya iimaliwa yuunasikola wombelewa ndjoka a kala ha longo mo, oyaana yaasita ayeke, okwe shi yolo ashike.

“Omaidilo agehe haga holoka po, ohaga tulwa tango melandulathano paitsa yomoonzapo dhawo, opo tu mone mboka ye na iitsa iwanawa. Netaambwo lyomwiilongi ohali uthwa ihe kiitsa yomonzapo ye, okuza kogwtango sigo ogwahugunina. Ngele omuna gwomusita oye e li po e na iitsa yi vule yooyakwawo ita thigwa po we molwaa-shoka e li ando omuna gwomusita. Kehe gumwe otu uthwa kiitsa yomonzapo ye,” osho e shi fatulula nokudhina omapopyo.



Omulongwapangi E. Akweenda

Omuwiliki gwandje Set Son Shivute, okwa kwatha ndje okuuva ko oshindji shomiilonga, osho a tsikile nefatululo lyonkalathano miilonga. Oshinima shoka osha simane unene miilongayakulo ayihe. Oshiwana omulongelwa kehe miilonga ta tonatele eihumithokomeho lyaalongeli ye. Ihe ota ti wo oshiwana aalongeli ngele kombinga yawo taa holola ohokwe yawo yeihumithoko, shoka osho ashike tashi fala iilonga komeho.

Meme Emilia okwa ti kutya okwa koneke eidhino tali pangele maalongeli yamwe moshinima sheihumithokomeho. “Eidhino ndyoka ando li mone ehulilo,” osho a popi newi lya yeluka sho tu ulike etsomukumo kaanashilonga ooyakwawo moshigwana.

Onkalathano yopokati kaanashilonga aape naamboka aakulu, omunashilonga omukulu Emilia okwa ti ndjoka otayi opalekwa nuupu kaalongelwa, ngele taa yambula po aanashilonga yawo aakulu, peha lyokuligamena owala kumboka aape ye na oonzapo onene.

Sebulon Ekandjo

Uuwinayi itau sindi uuwanawa

Ndika emanguluko lyaIsrael neso lyuulunde tali popiwa ngaashi tali monika mondjokonona yAaheberi. Aana yaIsrael sho ya adhika ya gonyenwa noya dhangilwa ondjoko yuupika ku-Egipiti; Egipiti otali talwa endhindhiliko lyuuwinayi (uulunde) monkalelo yokushundula, noonkondo dhomathiminiko, eyonagulo lyuuntu nuupika wopasatana.

Israel ota talwa ongendhindhiliko lyokwiigandja kuKalunga nokukondjela uuwanawa. Egipiti okwa kondjo opo a kaleke po ondjoko yuupika, omanga Israel a kondjo opo a ete emanguluko. Farao okwa li i ikukutike, opo kaa yamukule elilo lyaMoses, nonando omageelo nomageelo ga li taga tilitha epangelo lye.

Shika otashi tu dhimbulukitha uuwinayi mboka u li muuyuni mbuka, ihe nando ongawo uuwinayi otu kondjithwa kuuwanawa. Ano konima yekondjo ele pakwatho lyaKalunga Aaisrael oya taaguluka efuta etiligane ya ye kuJerusalem, ya ka hambelele Kalunga kawo. Ihe Aayegipiti oye ya landula sigo omefuta etiligane, opo ando ye ya galulile muuwinayi.

Ethikilo lyeityo lyehokololo ndika kali shi ando eso lyaakwiita yaEgipiti, oshoka Ombimbeli oye tu indika okunyanyukilwa eso lyomuntu omukwetu. Ihe ehokololo otali tu ulukile eso lyuuwinayi, eso lyomahepeko kaage shi gopantu neso lyehanagulo lyeliko lyomuntu.

Olweendo lwaIsrael mefuta etiligane neso lyAayegipiti otali holola ekondjithathano (olugodhi) pokati kuuwanawa nuuwinayi.

Uukwashili wotekisti ndjika otu hololwa kekonjo pokati kuuwanawa nuuwinayi, pamukalo gwemanguluko nuuyyuki tau kondjo momathiminiko nuukoloni. Omathimbo gomimvo odhindjidhindi dha piti, aantu yomuAfrika oya li ya ningi iihakwanwa yuukoloni waEuropa, kaaye na uuthemba pandhino yaakwiilongo.

Moshilongo kehe omwa li mwa anduka “Moses” omupenda ngoka ta kondjitha uukwaanuyyuki mbuka. Eipumomumwe ndika lya li noli li pokati koonkondo dhuukoloni naantu yaAfrika, otali talwa muuyuni aume ongekondjo edhigu nenene methelemumvo ndika etimilongo mbali.

Osho oonkondo dhuukoloni dhe ende tadhi kana, omanga esindano lyoonkondo dhuuyyuki waKalunga nodhesimaneko lyuuntu odhe ende tadhi adhika. Eeno, uuwinayi nuulunde wa longelwa Israel kuEgipiti owa li wa sile mefuta etiligane. Otatu shi mono wo nomuAfrica. Sigo omo 1960, iilongo yaAfrika yi vule 30 oya li ya manguluka, ihe ngaashingeyi iilongo iyali ayike inaayi mona eipangelo.

Shimwe shomuyo oNamibia. Tashi ulike kutya oonkondo dhuulunde nuukoloni, Kalunga okwe dhi dhipagele kooaha dhafuta. Omulanduli gwiiningwanima yoshilongo shetu, ota koneke kutya uukoloni moNamibia ou li pokusa. Oonkundathana ndhoka dha kala nokuningwa kuCuba, Angola, Amerika na SA otadhi ulike kutya uulunde wuukoloni nomahepeko mevi lyetu otu sile ngaashingeyi mefuta etiligane ngaashi Aayegipiti.

Nomeho guulunde mbuka otaga pathimine eso. Osha yela kutya konima yomasiku gontumba, o-

Oipango omulongo yaKalunga

Dha za kep. 3

OSHIPANGO OSHITIVALI

Inamu ana oipupulu nokushekifa ngaha edina lange. Lev 19:12 Opo ne ame nda li ndi liuditile edina lange liyapuki olukeno eumbo laIsrael eshi le li shekifa mokati koiwana Hes 36: 21-23. Petrus okwa filwa onghenda, osheshi okwa nyona oshipango pefimbo laJesus.

OSHIPANGO OSHTITATU

Kalunga okwa tulumukwa mefiku etiheyali koi longa yaye aishe e i longo Gen 2:1-3, Ex 35:1-5, Jer 17:21-24

OSHIPANGO OSHITINE

Umwe ngeenge e na omona omumati omupwidi, a lunduka, ye ina hala okuuda xe naina, ye iha dulika nande ve mu denge, nave mu twale kovakulunhu voshilongo, ovalumenhu aveshe voshilando ve mu dipae nomamanya. Deut 21:18-21, 2 Sam 18:9-17, Omayel 23:22-25

OSHIPANGO OSHITITANO

Kain okwa nukila Abel nde te mu dipaa, Gen 4:8-16, + Sam 11:21. Ovadipai aveshe ovana vasatana. Ovayandji voudio osho yo, ovakufi vomadimo novangabeki voludalo molwouhalu u lilli nau lili. Eli edipao lomuEgipiti Ex 1:16-22. Ovadipai aveshe otava dimbulukifwa: Keshe ou e tonde mumwaina, omudipai 1 Joh 3:15.

OSHIPANGO OSHITIHAMANO

Ndele David okwa shangela Joab onhumwafo ndee te i tumu naUria, ndee ta ti: Tula Uria monhele yokomesho molwoodi lipyu. Novalumenhu vomoshilando eshi va tota ndee tava lwifa Joab, movapiya vaDavid omwa fya vamwe, naUria, 2 Sam 11:14-17; 13:1-14, Omayel 22:14; 23:27-28.

Ovanyoni voshipango osho mokulesha eendjovo odo oto udu nghee va wila momupya wefyo. Ino nyona ohombo. Ou wa hombola naau wa hombolwa, kwata nawa ohombo yoye i he ku xutuke, ove u he i nyekwe kuvakweni. Ef 5:22-33 1Petr 3:1-7.

Omumati nokakadona inamu nyona ohombo. Ohombo nai lilongekidilwe manga inamu ya muyo. Ohombo otai wapekwa noilonga yomake nonokutuvikila emona leumbo nawa nokulungekida oikulya ya filwa nawa oshisho. Osho tashi nyono ohombo, okuya pondje yeumbo komukainhu e lili ile komulumenhu e lili. Okulwe nomikifi dohoni, ei aishe oinyoni yohombo. Nai livangekwe hano.

OSHIPANGO OSHITIEYALI

Ino vaka. Olyelye e shi nyona? PaMbibili osha nyonwa kuAkan Jos 7:1; 4-26 naAnanias naSafira, lil 5:1-11, 3 Mos 19:11; 35-37. Ovalunga ava ova wila momupya wefyo. Nakeshe tuu ou te lihongo okuvaka na kale e na eshiivo kutya oulunga otawu mu twala mefyo lokolutu nolokomwenyo.

Omaulunga oku li patatu:

a) Oulunga wokukufapo oshinima moumbudi.
b) Oulunga womondado, pamukalo u li ngaha omunhu umwe oku na ehauto, la nyonauka okambosha haka umo, ye he ka twikinikepo, lo tali ende ko eekilometa nhano, ko haka umo, ye he ka shuna mo, fiyo a fika oku ta i.

Nokonima eshi a loloka, ota hovele nee oku shingifa etuwa la tya ngaho, ye ta holeke enyonau-

ko lokambosha, ye ta lombwele omulandi: Inda mo u tale. Winya eshi a ya mo, otali duma nawa, te li endifa popepi opo, ko okambosha ihaka umo noupu. Paife eshi omulandifi ota pula mukwao okanduba komafele. Omulandi ta lande. A ye mo tuu metuwa, oku ta i ina fika enyonauko la hovela. Omulandi ou ota udu nai.

c) Oulunga wometoolo, omunhu a toola oshinima shamukwao, ndele te shi holeke. Ino holeka oshinima shovanhu, shiingida ndele to shi pe mwene opo u ha vake.

OSHIPANGO OSHITIHETATU

Elundilo olo oshiponga. Ola tandavela unene, navamwe ova kanifila ovanhu eemwenyo molwelundilo. Umwe ota ka lundila mukwao keembulu a dipawe, umwe ota ka lundila mukwao koSWAPO a dipawe, noshonsho. Olyelye a lundila paMbimbili?

Isebel a lundila Nabot, 1 Eeh 21:1-24, 22:34-40. Elundilo la eta oshiponga kovalundili, 2 Eeh 10:1-18,9:6-13; 22-37 na omwalikadi waPotifal a lundila Josef 1Mos 39:7-20, 1Kor 4:13, 2Kor 12:20.

OIPANGO 9-10

Okahalu oko oshiponga, omuhaluki oha dipaifa ovanhu. Olyelye a haluka paMbimbili? Ahab 1Eeh 21:1-4. Okahalu ohaka ningi okafimba, Jak 1:15. Ovanhu paife ihava dipawa vali moku-nyona oipango, osheshi tu li koshi yefilonghenda. Lesha Joh 1:17, Rom 6:23, 7:6-8:1-2 2 Kor 3:6.

A. Muleka

Ouhakumwenyo komunwi

1. Okuya kuye.

Oshi na ondilo unene okufikama nokuya ko komunwi ho mu diladila. Tala kutya oku li po ngahelipi. Kendabala u mone ongodi yeenghundafana naye. Nge wa mona omhito ile ino mona, pitifa po omafiku ove to ka ya ko vali. Shi ninga manga lu 7.

2. Konga ou ta dulu oku mu kwafa

Nge ove mwene owa nyengwa ile wa tala ito shi pondola, mona kaume kaye ile umwe oo wa tala te mu hange. Mu tuma ko ove to mu pe ekwafu kutya ota dulu oku mu kwafa ngahelipi. Yambidida yo omutumwa ou opo a ha fye onywe.

3. Longekida omhito okweenda naye.

Ope na omhito oku mu ifana e ke ku teelele, mu ka talele po ile mu ye molweendo lonhumba, omo tamu mono omhito okutunga ekwatafano, nokukundafana melineekelafano ngaashi omhito tai shi holola.

4. Tameka oku mu ilikanena:

Luther ota ti: "Oshilonga nge sha ilikanenwa, osha pwa nokuli." Mu ilikanena tete nomanga ino ya ko, ino tuma ko, noinamu ya molweendo. Nena Kalunga oye e shi nghee te shi pitifa. Ye Jakob ota ti "Eilikano lomuyuuiki ohali dulu shihapu." Ye omona womailikano iha kana."


5. Menekela meumbo laye.

Nale ovanhu ova li hava talelafana po, nokumenekela. Mokumenekela nokukala pamwe nokukala umwe wovaneumbo nokulonga pamwe, otaku eta oupopepi notaku yeulula ondjila yokukwafa mukupopya nokukundafana pamwe, nokutala nokuuda ko oudjuudu ou u li po. Nopo yo tapa monika omhito yokulesha pamwe eendjovo daKalunga nokwiilikana amwe.

6. Mu shilila mongudu yeni

Nge ou na po ongudu yonhumba omo ho kala nokukoleka eitavelo loye ile oku li xumifa komesho, mu shilila mo. Otu na eengudu dihapu: doomeme, dootate, ongudumbibeli, omatine, dolwiimbo, domalikongelo deenghundafana nosho tuu. Na mone mo yo omhito yaye.

Waa pandula noyaka



Omasiku 18-20.8.1989, otwa kala nontanda yaakiitu megongalo Omuntele, ya dhanenwa mosinagoga Omulegongo. Nuunvo osinagoga ndjika oya tendelwa kegongalo epe, Onakazizi. Aakiintu mOmuntele oya laleke jhe ililo yawo mbyoka ya tendelwa kegongalo epe, ngaashi omukulukadhi ta laleke omwanakadhona ta ka tunga elugo lye.

Oye tu kumagidha nomatumbulo ga za

muKaaroma 12:11-21, eimbilo 589 mEhangano. Miikwalugo wa tala methano ndika, omu udha esheshela (uusila wongaya) nomakaka gompungu. Oshikaha sha yeluthwa ekutu omu na oomuma omwana a ka totele ko R 300,00. Kalunga ni indjipalithile esilohenda lye komuvali nguka, ye e mu yambeke. 2 Kor.9:8 Tangi unene, Omuwa na pandulwe.

Peha lyaakiintu mOnakazizi Maria M. Kaliili

EMANGULUKO LANAMIBIA



Omupresidende Sam Nujoma ta popi

“Osho sha kufile nge medu loomeme omu, oupika noukoloni nomakuyunguto moshilongo. Oyo ya twalele nge koilongo imwe oku ka kongwa ekwafo,” osho omushamane Sam Nujoma a tameka ta lombwele oonyuni wOvanamibia owo kwa lwe uya oku mu pwilikina lwotete mokwaa-luka kwaye kombada. Omutetekeli wekondjelomanguluko wehangano loSWAPO yaNamibia, noye omupresidende wayo, hailwa Shafoxuna, okwa tala nokwa tumbula nelimemesho ehafo laye okushakena nokumonafana vali noshiwana shaye, osho a ti kutya okwa topoka nasho nale. Dr Nujoma mokutonga ondjokonona yoita moNamibia okwa ti oshinima sha kala shidjuu.

Okwa twikila ta ti, oita oyo ya kala moshilongo noya kondjwa kOvanamibia, inave i tota okukondja momitwe davo, ndele ova shikula omukalo wovakuluvonale. Okwa holola kutya omido 1884-1907, opwa kala oita yOvandowishi tava


kondjita ominghoko, Ovanama nOvaherero.

Mokutumbaleka ekondjo lomapendafule ngaa-shi ooMandume Ndemufayo noolipumbu ya-Shilongo, pomido 1917-1932, Dr Nujoma okwa ti kutya, omhuku i na mwene ihai lungwina omushila, ote va dimbulukwa noku va fimaneka. Kwaaishe ei ota ti, oita oyo oya kala po molwoukoloni, nosha fimana mondjokonona yaNamibia.

Kwaayo ya ningwa meedula da pita, omupresidende Nujoma okwa ti oyo ya eta 1960 a fiye po oshilongo nelalakano okwe etela Namibia ombili. Mondjokonona yonghalo yoita, omushamane Nujoma okwa tya kutya kakwa li shipu okukufa ondjebo nokukondja.

Mokudimbulukwa oilonga youlumenhu mOvanamibia okulwifa omutondi, omupresidende okwa yelifila oshiwana shaye ta ti: “Sha longo twa kufileni ondjebo vakwe, ngeno inatu fikeni mombili ya tya ngaha.” Okwa yelifila oshiwana kutya, oSwapo mokukondjifa omutondi wayo, oya kala ye litula moukumwe nomelongeloku-mwe. Omushamane Nujoma okwa tya kutya mekondjo lavo neendjebo okulwifa omutondi, omutondi okwa itavela nokwa hovela okwiingida ombili.

Tala kepannja tali landula



Omutopelo ogwa landulwa ketiko lyombinzi

Okamatyona David Elieser (12) nokamwayinagona David Kawela (6) auhe momukunda Onyati muuzilo wOndonga, owa kala tau pangwa iilalo yooholo mbyoka uunona mboka wa ti oya zi mokudhaadhigwa noboma komakakunya. Osoondaha 24. 9. 1989, uumati uyali, owa hokolola kutya esiku ndyoka pomutenya, owa li ashike tau dhana momuzile gwomuti pooha dhondjila onene yokuya kUushimba. Manga wa pwila muudhano, ohaluka ou uvu etopo nokonima ou wete ombinzi tayi tondoka.

Uunona sho wa ka yelutha omeho, owa ti kutya owa mono oshihauto shomakakunya tashi piti po tashi yi. Oshitandu shimwe shoshitopitha oshe etelewa moshipangelo shi ninge uumbangi moshiponga.

Omukulukadhi Hilma Nandjala, yina ya-David Flieser, okwa hokolola, kutya siku

ndyoka lwokomatango kashona okwa li ti ilongekidha a pite mo megumbo. Etopo ye li uvu, kaya li ye na unene nalyo. Ohaluka uunona otau ya megumbo wa tiligana ombinzi.

Meme Hilma ota ti sho ya ka konakona poshiponga, oya tompelwa kutya egameno lya-Kalunga olya li po enene, oboma sho ya dhenge tango moshitayi shomuti e tashi gu tatula. Omuvali ke uvite ko methimbo lyombili tayi igidhwa nomatati ga tulwa po, ihe oku na natango oonkambadhala dhokudhipaga aakeenandjo.

Pamupopihapu gwoshipangelo shoka, oshinima osha lopotwa kombelewa yaapolosi noshitandu shoshitopitha osha yiwa nasho kaapolosi yaUntag.

Sebulon Ekandjo



Meme Hilma Nandjala, Onyati egongalo Onankali, ota yakula uunona we mOnandjokwe mboka wa dhaadhigwa oboma komakakunya 24.9.1989.

LE UYA YO KOLUVANDA

Omupresidente woSwapo okwa lombwela engafifi lovanhu ovo ve ili koshoongalele osho shopandjokonona ta ti, oshikumwifa pakutonga, noshiwa okuhokolola ngeenge ta tongo ondjonona yekondjo muNamibia. Okwa twikila ta ti, oSwapo oya humbata epandela mokuholola kutya oya lwa oita ya shikula omukalo wokukondjifa oukoloni moshilongo, ngaashi wa kondjifwa nale kootatekulu.

Pefimbo omupresidente ta popi, oilyo yongudu yaye omayovi nomayovi okwa li ye mu ongalela nokupwilikina nelitulemo. Konyala kekulilo letumbulo keshe, ovanhu ova kala tava pandula nomake neenghuwilili, ye te limemesha manga a tala oshiwana shaye nodjuulufi inene.

Omushamane Nujoma okwa koleka kutya etulomolonga lokatokolifo 435, ola holola kutya ekondjo loSwapo ola kala nelalakano nola hanga efikilo lekondjo lalo. Apa okwa halela keshe

Dr Nujoma okwa twikila ta ingidile oshiwana shaye ta ti, oita yeendjebo oya xula po, shi li ko oku ka hoolola Swapo-nye tu i tule koshipundi omuyabididi woSwapo, kutya a kale nomwenyo mule, Namibia nali manguluke, ye Swapo na pandulwe.

fyee vene. Swapo okwa itavela omhepo youmwainafana Ovanamibia aveshe inaaku valulwa oukwamunghoko waye.

"Natu tuvikileni nokweekelashi ekapiteli likulu lomauwi aeshe twa ningilwa efimbo la pita. Natu tamekeni ekapiteli lipe mokudimafana po nokuholafana," osho omupresidente woSwapo yaNamibia a ingidila oshiwana shaye, moshongalele shaaveshe eti 24.9.1989 moVenduka.

Eengudu dihapu domalwiimbo e lili nokulili



Mboka yi ile moshigongi oya li taa monika ya ninga onyankanyanka mokapale akehe. Yamwe ya shuna inaa mona ehala.

Eopaleko

MOmukwetu No. 15/89, omwa tumbulwa edhina Selma Amukugo, omukulukadhi gwate Armas Amukugo. Tala epandja 5. Edhina oli na okukala Hilma. Ishewe mOmukwetu No. 17/89 epandja 6, omwa tumbulwa edhina iyomundohotola Helena Iithindi, ihe oli na okukala Hileni Iithindi. Omukwetu ota gandja ombili kooyene yomadhina ngoka.

Amushanga gwOmukwetu

Ewi leindilo kombinga yehoololo la dja monhanda yovakainhu mondjakulwambinga mOushimba ELCIN

Onhanda yovakainhu mondjakulwambinga mOushimba ELCIN oyo ya ongalele mOlange okudja 21-26 September 1989 otai indile oshiwana shi ha longife oikolwifa nandenande pefimbo lehoololo.



Aatonateli yitayingeleki yomOwambo methano ndika otaa konakona omahala mokaalita, mpoka tapu vulu natango okudhikwa ehala lyehogololelo. Ota ye shi ningi pamwe nomukalelipo gwOmbelelwa yaUntag methano kolulyo.

kwa li tava tumbaleke omuleli woshiwana shaNamibia, omunhu kwa li nande to hale eetundi di ye komesho. Ongudu yoNdilimani mokukwatela komesho omaimbilo ekondjelo-manguluko, keshe umwe okwa li te li nyenge ngaashi ta dulu nokuimba: "Sam ou li peni yelula epandela laNamibia.

Mokutala nomokudiladila efimbo la ya, eshi e li yeleanifa nefimbo lonena moNamibia, omupresidente woSwapo okwe shi tonga e he na malimbililo ta ti: "Emanguluko laNamibia ole uya koluvanda," ye te limemeshele ovaholimbili aveshe ve ile okushakena naye.

Taati Kanana

1. Oikolwifa oyo omukundu munene oo tau dulu oku ku twikifa u ha mone osho to ningi mombapila yehoololo.

2. Otai ku imbi okuya kehoololo, osheshi oyo omwiyo oku ku kwata u ha ye kokakefa kehoololo.

3. Elidiliko loikolwifa pefimbo lehoololo olo elilongekido noukolele woshiwana nomefimbo yo olo tali ya.

Omuniyoli
Aino Kapewangolo (Mrs)
Omuwiliki

Tseye edhina lyoye

Luisse na Lovisa	= omukiinti
na Loise	= omukiinti
Lusia na Lukas	= omweeti guyelele
Leonard	= ependa a fa onime
Leila	= omuluudhe ngekala
Lea	= omunaluhodhi
Lavinia	= a yelithwa
Laura	= oshishani shongala
Julia na Julius	= a nika uugundjuka
Judith	= nakuhambelwa
Josefina	= omugwedhilipo
Irja	= okumenyamo
Ingrid na Inga	= omusindani omukiinti
Ida	= enyanyu
Markus na	
Martin na	
Killian	= e hole iita


IILUMBU MBYOKA YA PANGELE MUSOUTH AFRICA 1652 — 1988

Etsikilo

Onda koneke kutya omathimbo gamwe opo omuntu u uve ko ondjokonona yuukoloni molukadhi lwaAfrika, owa pumbwa wo u tseye nokutya oolye ya li aawiliki Aatiligane muSouth Africa okuza 1652 sho iilumbu ya tulilile mOkapa.

Shika otashi kwatha opo omuntu u tseye kutya sho uukoloni wa kala tau taandele molukadhi lwaAfrika okuziilila unene mu-South Africa, opethimbo lyoshilumbu shini tashi pangele mOkapa.

Ondi inekela mboka mu li moosikola otashi mu kwatha wo mu dhimbulukwe omadhina ngaka nomathimbo gawo gokupangela. Ihe dhimbulukweni wo kutya nando mboka tatu ya luku aawiliki, itashi ti oyo ya li aawiliki ya pandika kAayafrica yaSouth Africa. Aawiliki Aaluudhe inaa kwatelwa mo nena momusholondondo nguka, ihe inaa dhimbiwa, yo inaa dhinika komunyoli nguka. Mboka otaa tege ngaa olufo lwawo.



Omusita S. V. V. Nambala

1795 - 1802: Engelanda mOkapa

Mbaka taa landula oyo ya kala aawiliki. General Jas Henry Craig (Com.), 1795 - 1797. Lord Macartney (Gov.), 1797 - 1798. Major - General Francis Dundas (Ac. Gov.), 1798 - 1799. Sir George Yonge (Gov.), 1799 - 1801. Lord Glenbervie okwa li a hogololwa a ninge o "Governor" 1801, ihe ina kutha oshipundi shoka. Onkee Dundas ngoka a popiwa metetekelo okwa kutha ishewe uuwiliki mpaka okuza 1801 - 1803 (Ac. Gov.).

1802 - 1806: Aaholanda ya shuna koshipundi mOkapa

Otwa mono ngaa kutya shoka Aaholanda taa shuna koshipundi, ye Dundas oye omuwiliki. Ta landulwa ku J. A. De Mist (Com. Gen.), 1803 - 1804. Opo ihe taku ya Lt.- Gen. J. W. Janssens (Gov.), 1804 - 1806.

1806 - 1910: Engelanda a lalulula Okapa

Okuza pethimbo ndika Aaholanda ya kanihilile ngaa nee oonkondo dhawo muSouth Africa. Kakele owala shila kutya aatekulu yoombulu omo ye ya thiga. Mbaka oyo ya ka etela Aaingilisa uupyakadhi komeho, sho taa kondjele oshipundi nAaingilisa. Pethimbo ndika mbaka oya pangele: General David Baird (Ac. Gov.), 1806 - 1807. Lt.-Gen. H. G. Grey (Ac. Gov.), 1807. Du Pre Alexander gomimvo 29, (Gov.), 1807 - 1811. Lt.-Gen. H. G. Grey (Ac. Gov.), 1811. Lt. Gen. Sir John F. Cradock (Gov.), 1811 - 1814. Lord Charles Henry Somerset (Gov.), 1814 - 1820. Pethimbo lya-Somerset konyala iilumbu 5, 000 oye ya yi mbwitike mOkapa.

Okuza 1820 - 1821 Lt.-Gen. Sir Rufane Donkin (Ac. Gov.) oye a kala a keelela-ehala manga Somerset e li kefudho. Somerset a tsikile ishewe, 1821 - 1826. Taku landula Major - Gen. Richard Bourke (Ac. Gov.), 1826 - 1828. Lt.- Gen. Sir Galbraith Lowry Cole (Gov.), 1828 - 1833. Lt.- Col. T. F. Wade (Ac. Gov.), 1833 - 34. Taku ya Major - Gen. Sir Benjamin D'Urban (Gov.), 1834 - 1838. Pethimbo lya D'Urban otu na okudhimbulukwa kutya omukalo guupika ngoka hagu ithanwa "Slavery" - ano omukalo gokulanda nokulanditha aapika, ogwa hulithwapo mepangelo lyAaingilisa omumvo ngoka 1834. ZOkapa omwa adhika mu na pethimbo mpoka aapika ye thihe lwo-po 36,000. Ehulithopo lyuupika ndika olya geyitha oombulu ndhoka dha adhika nale inaadhila hala epangelo lyAaingilisa mOkapa. Onkee momumvo 1836 sigo 1838 Oombulu odhindji odha thigi po Okapa dhi landule Ombulu onkwawo Louis Trichardt ndjoka ya tembukile omumvo 1835. Shika osho hashi ithanwa "Die Groot Trek"--- ano "Etembu Enene" lyOombulu dhu uka meni lyoshilongo shaAfrika.

Ngoka a landula D'Urban oye Major - Gen. Sir George Napier (Gov.), 1838 - 1844. Lt.-Gen. Sir Peregrine Maitland (Gov.), 1844 - 1846. Sir Henry Pottinger (Gov.), 1847. Lt. - Gen. Sir Harry Smith (Gov.), 1847 - 1852. Lt. - Gen. Sir George Cathcart (Gov.), 1852 - 1854. C. H. Darling (Ac. Gov.) 1854. Sir George Grey a fa "Governor" na "High Commissioner", 1854 - 1859. Ta landulwa ku Lt. - Gen. R. H. Wynyard (Ac. Gov.), 1859, manga Grey a li kuEngelanda. Grey a galukile kuuwiliki (Gov.), 1860 - 1861. Lt. - Gen. R. H. Wynyard ishewe (Ac. Gov.), 1861.

Opo ihe Sir Philip E. Wodehouse (Gov.), 1862 - 1870. Sir Henry Barkly (Gov.), 1870 - 1877. Sir Bartle Frere (Gov.), 1877 - 1880. Major - Gen. Sir George Strahan (Ac. Gov.), Sir Hercules Robison (Gov.) 1881 - 1889. Sir H. Brougham Loch (Gov.), 1889 - 1895. Sir Hercules Robison (Gov.) ishewe, 1895 - 1897. Sir Alfred Milner (Gov.), 1897 - 18901. Iita yAaingilisa nOombulu ("Anglo - Boere Oorlog") sho ya tameke / 1899 - 1902, oya adha Milner oye ta wilike mOkapa. Ta landulwa kuSir Walter Hely - Hutchinson (Gov.), 18901 - 10..

31 Mai 1910: OyUniona yaSouth Africa

Oombulu sho dha pwakele nAaingilisa, Aaingilisa oya sindana. Ihe Aaingilisa oya pe okangundu kaatiligane yaSouth Africa oko ka tsikile ewiliko lyuukoloni, okuza omumvo ngoka 1910 sho iitopolwa ine yaSouth Africa ya tulwa kumwe yi ninge o "Union"--- ano iitopolwa mbyoka ya li tayi pangelwa kOombulu sho dha fadhuka-po Okapa (Orange naTransvaal) ya tulwa kumwe naambyoka ya li kAaingilisa (Natal naKaapa). Aawiliki oya tsikile ngeyi:

Lord Gladstone (Gov. - Gen.), 1910 - 1914. Pethimbo ndika wo omukalo guuministeli ogwe etiwa mo. Nomolwasho oto adha pu na o "Governor" no "Prime Minister" oshita.

Manga Gladstone e li o "Governor" ye Gen. Louis Botha o "Prime Minister", 1910 - 1919. Mboka ya landula Gladstone oyo: Viscount Buxton (Gov. Gen.), 1914 - 1919. Prince Arthur of Connaught (Gov. - Gen.), 1920 - 1923. Earl of Athlone (Gov. - Gen.), 1923 - 1930. Earl of Clarendon (Gov. Gen.), 1930 - 1937. Sir Patrick Duncan (Gov. Gen.) 1937 - 1943. Rt. Hon. Gideon Brand van Zyl (Gov. - Gen.), 1943 - 1950. Dr. the Rt. Hon. E. G. Jansen (Gov. Gen.), 1951 - 1959.

Mboka ya landula Louis Botha muu "Prime Minister" oyo: Gen. Jan Smuts (PM), 1919 - 1924. General J. B. M. Hertzog (PM), 1924 - 1939. Opo ishewe General J. Smuts (PM), 1939 - 1948. Dr. D. F. Malan (PM), 1948 - 1954. Johannes Gerhardus Strydom (PM), 1954 - 1958. Dr. H. F. Verwoerd (PM), 1958 - 1966. B. J. Vorster (PM), 1966 - 1978. Opo ihe P. W. Botha (PM), 1978 - 1984 ta hugunine.

Omukalo-guu "Governor - General" okuza puJansen ogwa tsikile ngaa sigo tagu ka hengumukila mumwe nuupresidente. Opo ihe Charles R. Swart okwa landula Jansen. Shika otashi ti ngeyi nokutya Charles R. Swart okwa kala oGov. - Gen. okuza 1960 - 1961. Opo ihe ta ningi Omupresidente 1961 - 1968. Ta landulwa ku J. J. Fouche (P), 1968 - 1975. Dr. N. Diederichs (P), 1975 - 1978. Mpaka opo ihe omusamane Vorster a etha po uuministeli e ta ningi omupresidente okuza 1978 - 1979. Ta landulwa ku M. Viljoen (P), 1979 - 1984. Okuza 1984 omusamane P. W. Botha oye e li omupresidente. Omukalo guuministeli ogwa hulithwapo 1984.

31 Mai 1961: South Africa a ningi oRepublika

Mboka ya li moosikola nenge ya li aalongi momvula ndjoka 1961 nomuNamibia otashi vulika natango taa koneke nkene uupandela waSouth Africa wa li ta topolelwa aanasikola. Shoka osha li tashi ningwa okusimaneka South Africa ta ningi oRepublika. Mupya-munene, South Africa nando sha li sha talikwa okwa mono ihe emanguluko okuza mepangelo lyaakwiilongo, onkee tuu sigo onena ope na epulo lyemanguluko lya South Africa. Unene tuu sho epangelo lyoshilongo shoka lyaa na uuyuku, sho tali thiminike nokwiimba aaluudhe ya kuthe oshitopolwa miinima yoshilongo pamanguluko. Orepublika ndjoka oyo owala yi lile po omwaalu

Tala kep. 9

Mokati komatillitho gokudhipagwa, omusamane Sam Nujoma (80) omupresidende gwoSwapo okwa thiki muNamibia eti 14. 9. 1989, konima yoomvula konyala 30 a kala muupongekwa. "Oohailwa nangame onda galuka mombepo yohole, yombili nokombanda yaashihe, onde ya mombepo yedhiminathanopo moshigwana ashike. Shika onda hala oku shi longa noonkondo adhihe nde dhi i-kelelwa nonetokolo lyaa shi ku

Aapangeli ya SA

Dha za kep. 8

omushona gwiilumbu mbyoka ya li yaa shi-wike moshilongo shoka komeho gomumvo 1652.

Otwa mono wo kutya pethimbo South Africa ta ningi oRepubilika, omusamane Verwoerd oye a adhikile oministeli yotango, omanga omusamane Swart oye a li o"Governor - General." Verwoerd okwa tsikile nuuministeli, ye Swart ta ningwa omupresidente gwotango gwepangelo lyokatongotongo. Okatongotongo oka tameke okuhanyekwa omumvo 1948 sho ongundu yopolotika yoombulu yo "National Party" ya gwini mehogololo. Ongundu ndjoka oyo tayi pangele sigo onena.

Osha yela ope na epulo kumboka yaa hole ondjokonona, kutya omolwashike oshinyolwa sha tya ngeyi shi na okunyolwa? Elalakano okweeta kashona nakashona e-veko lyondjokonona yoludhi lwaAfrika. Unene tuu yaNamibia ndjoka inaayi nyolwa unene. Ondi inekela mboka taa ningi omakonakono gi ili nogi ili gondjokonona, otashi vulika yi itse mo sha tashi ya kwatha.

Maawiliki yaatiligane mbaka twa tumbula mombapila muka, omu na mboka taa dhimbulukiwa miiningwanima yaNamibia. Ngaashi (tu tumbule ko owala yamwe.): General Jan Smuts pethimbo Namibia lya yi mEhangano lyiligwana (League of Nations); General Louis Botha pethimbo lyoombulu dha ponokele Namibia 1914/15; J. G. Strydom omolwOkapale okanene mOvenduka; Omusamane Verwoerd sho omavigumbo moNamibia ga tamekwa pethimbo lye mo 1964; B. J. Vorster ngoka a popiwa olwindji kAanamibia nokwa shangelelwe ombilive yomontaneho kOongeleki moNamibia 1971. Ye omusamane Botha oye ngoka nena ota indilwa kaanona yaNamibia a kuthe mo omakakunya ge muNamibia.

Ano onawa aantu yetu ye ende taa tseye ondjokonona ndjika, opo yaa kale owala taa ti oombulu nadhi shune koKakamas. Dhimbulukwa wo nokutya ondjokonona yoOorepublika mbali dhoombulu pethimbo lyAa-ingilisa mOkapa (ano Transvaal naOrange Free State) otashi vulu okwiitulilwa mokutula aawiliki yadho melandulathano. Ihe shika itatu shi ningi nena, ihe otatu shi talele owala kumwe naashika twa popi mekwatathano naawiliki mbaka ya guma South Africa alihe. Molufo talu landula otatu ka tala ngiika oolye nenge iilumbu yini ya kala komutse gwepangelo lyuukoloni moNamibia okuza 1883 / 4.

S. V. V. Nambala

NUJOMA A GALUKILA KEGUMBO MOKATI KOMALIMBILILLO

galulwa"osho a popi mokuthika kwe.

Mokupopya kombinga yedhiminathanopo moshigwana, omusamane Nujoma okwa ti, okuza nena natu dhimbweni nokuthiga po ontokolwa ndjoka ombwinayi. Mokudhimbulukwa uululu wekondjo woomvula oonde, uukwamuhoko wetondathano nokwaainekelwa kwa dhiginina mutse Aanamibia, iinima mbika nayi thelwe oshilambo sigo aluhe.

"Natu tamekeni ontopolwa ompe twi ikwatelela kohole, kombili, kuuthemba womuntu, okuhola oshilongo shetu, okusimanekathana nokushilipaleka edhiminathanopo. Konima yoomvula odhindji dhiita, oshilongo shetu osha pumbwa ombili neidhidhimikilathano lyetumwalaka lyomupolotika kehe," osho a gwedha po.

Mokuhiya Aanamibia Aatiligane ya kale moshilongo konima yemanguluko okwa ti;

"oshilongo shika oshinene, otamu vulu okukalwa kukehe Omunamibia, omuluudhe nomutiligane. Kepulo lyOmbaye, omusamane Nujoma okwa ti uuna Swapo ta popi emanguluko lyaNamibia otashi ti oshilongo shoka mwa kwatelelwa nOmbaye noontuntu dha-Penguin. Okwa pangula keso lyomunaveta gwoSwapo, Anton Lubowski, ngoka a yakelwa nokwa dhipagwa konima yomasiku gaali, manga ye inaa thika moshilongo, nokwa ti Lubowski ota ka dhimbulukilwa neitulomo lye omolwemanguluko uuyuuki nuukumwe woshigwana, iinima mbyoka e yi sile.

Omusamane Nujoma okwa ti: "Swapo okwa kanitha omutungingundu nomutholomi gwolute lwekokekongundu. Namibia okwa kanitha omumati nuuyuni owa kanitha omukwiita a simana gwokondjela uuthemba waahepekwa.

(NCC/Windhoek)



Esiku omusamane Sam Nujoma a thika moshilongo, okwa hambelelwa moshilongo ashike. Ehambelelo methano ndika olya ningilwa mOwambo okuza Oshakati sigo Onandjokwe.

OONGUNDU 11 MUNAMIBIA DHI INDILA OMPITO MEHOGOLOLO

Oongundu dhopolotika 11 muNamibia otadhi ka indila aakwashigwana taa tengenekwa ashike 680 000 ye dhi hogolole muNovomba ngoka tagu ya. Otaku tiwa ongundu opo yi kale ya pita nawa mehogololo ndyoka, ongele ya mona omawi 9 500.

Osha ningwa olwindji miigongigongalo momagongalo, kutya mpo pu thike aahogololwa oyendji, opo wo pu thike taa mono omawi omashona lela. Momagongalo shoka ohashi opalekwa nondjila yimwe ayike, o-kekelahi mo aahogololwa yamwe, unene mboka ya zi mo nomawi omashona lela, opo mboka ye na omawi ogendji ya tsikile okukondjithathana.

Umukalo ngoka paupolotika itagu longo. Oshigwana okwiitopola muungundu 11 okwiitsika shoshene uudhigu komapepe, unene aawiliki mboka taa indile oshigwana shi ya landule.

Pauyelele mboka u li po wa kolekwa lwa-hugunina, ehogololo otali ka tameka

7-11.11.1989. Kutya otashi vulika li gwedhelwe nando onesiku limwe nasho inashi kolekwa manga. Sigo oompoka moshitopolwa shOwambo omwa tengenekelwa ashike uuketha wehogololo 50, nonando ope na wo iihauto tayi ka enda nomahala okuhogololilitha.

"Oshinima shomahala gomahogololo oshi na omaupyakadhi ogendji, onkene otatu pumbwa ekwatho lyaasita momagongalo", osho omupopihapu gwOmbelewa yaUntag pOndangwa, a tumbula moshigongi shesiku limwe shaasita moNiipa 20. 9. 1989.

Sebulon Ekandjo

Ova shangela nge tava ti.....

Omapopyo gaawiliki yamwe yoongundu dhopapolotika itaga taambwako koshigwana

Ngame otandi ekelehi kokule oshipopiwa shomuwiliki gwongundu yo DTA, omusamane Dirk Mudge, shoka a li a popi oshiwike sha zi ko. Omusamane Mudge okwa li a tumbula omadhina gaawiliki yongundu yo DTA, ngoka aniwa ga dhipagwa po. Mokutala moshipopiwa shaMudge, ondi wete a fa natango inaa yoolola omathimbo gombili komathimbo giita.

Omusamane Tambo ota hwepopala

Opwa kundanwa kutya omusamane Oliver Tambo, omuwiliki gwongundu African National Congress mu SA, ota ti po hwepo sho a tuminwe kuLondon muAguste monkalo kaayi li nawa. Omusamane Tambo okwa kala muZambia moka a adhika kusha muuluwi nokwa yi moshipangelo.

Ta tsakanitha oomvula 72 omwedhi nguka, omukulupe Tambo okwa thigile po SA 1960 mbala konima yomadhigwa gaantu muShaperville moka ongundu ye ya patwa ilonga sigo onena mu SA.

Pethimbo lyiita olugodhi ihalu tala komuwiliki nosho wo kwaamboka taya kondjo moshitopolwa



Omupresidende gwa ANC mu SA Oliver Tambo, ngoka naye a tegelela a galukile mu SA.



sholugodhi, oshoka ayehe aatondi owala. Tse otu shi shi otwa kanitha omarendafule, ashike oshili sha yela kutya osha li pankatu yolugodhi, ano yiita. Ashike oshinima sha simana mpano osho owala shika kutya, tse itatu ka pula nando ogumwe omwenyo gwomuntu, ngoka a sa andola, ihe otatu ka dhiminapo owala kehe omuntu, mwa kwate-twa ayehe mboka ya kala nokundaadha aamwameme moAngola.

Dirk Mudge okwa popi aawiliki yomadhina ga adha pugatu ngaashi Kapuuo, Ndjoba naShiyagaya. Puyemwene okwa fa a tala sha fa she mu kenyeneka, ye iha tala nokudhiladhila oCassinga. Tse otu li methimbo lyokuya kemanguluko, ashike inatu pumbwa omuntu ta lafulula iilambo ya filwa nale. Tse otwa pumbwa edhimitanapano netaambathano nopwaa na ngoka ta landula iinima mbyoka ya pita nale.

Shino oshi li sha yela, kutya ngoka ta endulula iinima mbyoka ya pita nale, osha yela kutya ye ina hala ombili nedhimitanapano. Mokupopya Mudge okwa li a popi a thanekela komapopyo gomusamane Geingob, sho a li a yelitha kutya kehe shoka tashi ka ningilwa omupresidende Sam Nujoma, osha yela, kutya oshi li oshinakugwanithwa sha SA.

Ngame otandi shi koleke kutya, eeno! Pethimbo ndika lyombili nedhimitanapano sho pwa shainwa ombili, kape na nando omuntu ta ka katukila mukwawo onkatu noshi li wo sha yela kutya ngele omupresidende gwaSWAPO, omundohotola Sam Nuyoma okwa ka adhika komadhigwa gontumba, shi kale sha yela kutya oshinakugwanithwa sha SA pamwe naalanduli ye.

Oshi li wo tashi limbilike kaawiliki yoongundu dhimwe dhopapolotika ngaashi oDTA no NPF, ndhoka dhi li tadhi popile noonkondo emanguluko nosho wo oku wanekele Namibia onkalo yonakuyiwa ombwanawa nosho wo ehulithopo lyokatongotongo. Ngele tatu tala oongundu dhopapolotika adhihe, SWAPO yaNamibia oyo ayike ongundu yi li tayi lalakanene emanguluko nuuthikepamwe wAanamibia ayehe.

Tala kepanja tali landula



Omusita N. Shinana nomwana Timoteus ngoka a kala metanga lyaSWAPO

TAUNO YASHINANA, MALAKIA GAJOHANNES NAIIPINGE YANANGOMBE

Onkundana oya thiki nokombanda yomafuta sigo okuAmerika lyokolundume. Kashi shi owala enyanyu kaakwanezimo onzi yimwe ngele tayi itedhulula, ihe osho wo shi li enyanyu nepandulo koshigwana sha-Namibia, uuna Aanamibia, aapukithwa koombulu dhuukoloni taa dhimbulula uulingilingi waakolonyeki naayugi yiilongo yaantu.

Omukwetu gwaJuli 15, 1989 ogwe tu adha huka kondje yaNamibia, tagu hokolola nkene aantu naamwayina taa panga ombili. Molufo nduka omwa tothwa Tauno yaShinana (omwanamati gwakuume komunyoli) Malakia gaJohannes (a za popepi negongalo lyomunyoli osho wo Iipinge yaNangombe (gwomushiinda wegongalo lyomunyoli).

Mbaka ayehe yatatu nayalwe oyendji oyo mboka ya li ya hililwa menoko lyuukakunya woombulu nomiita yaa na elalakano lyokukaleka Namibia nombili. Mbaka yatatu oyo mboka yomongundu ndjoka omvula dha piti aaholimbili yaNamibia ya kala taye ya galikanene koshipala shaKalunga noku ya hiya ya ethe uuhahu nuudhudhu wopaukakunya, yo ya pange ombili noshigwana shoohe nooyina nooyinakulu oshithiminikwa.

Oomvula odhindji osha kala ongomuntu to dhenge kemanya. Sho aagundjuka yetu ya kala taa hiywa ya ze mo muupwidhi ye wu longwa owina okuteyapo oshilongo shawo, ihe oshigwana shaNamibia inashi etha oku ya hiya yi itedhulule. Odhoshili! Oshili yeitedhululo oko ya kala. Oshili yetaambathano nayo oko yi li. Olye a li te shi lala ondjodhi (nando osho ngaa twa kala tatu popi), okumona "oshikulo" nekakunya taa li nenge taa lala mombete yimwe? Ombimbili itayi fundju sho tayi ti: Omasiku otage ya onime

nuutana ya nape pamwe (Jesaja 11:6; 65:25). Ndika olyo ethimbo lyoshili ndjika tayi gwaniithwa moNamibia.

Einekelo lyetu olyo ndyoka, Aanamibia ayehe ya pukithilwa muukakunya nomiilonga ayihe yokulongela omutondi gwaNamibia, ya landule oshiholelwa shIipinge yaNangombe nokweelahi oonkinda adhihe dhepukitho.

MoNamibia ethimbo ndika kali shi owala ethimbo lyokudhimitanapano naayoni naapukithwa, ihe olyo wo ethimbo aayoni taa hiywa natango ya ethe po uuwinayi. Shoka tashi pumbiwa osho eitedhululo tango, opo edhimitanapano li vule okuningwa.

Eigidho nomagalikano otaga tsikilwa, opo natango aamwameme, aasamane yetu, ootate, aakulukadhi yetu, ookuume ketu naakwashigwana shetu yomakakunya ya tsikile okwiitedhululo nokweetha po uulunde pethimbo ndika, wa tungila ondjugo moKoevoet noSWAPOL.

Aamwameme nee, Tauno, Malakia, nIipinge, inamu za ko koshigwana sheni mu shune ishewe mekano noheli yuukoloni. Aniwa **Oshiti she ku kuthile egala, oho ende po to siisila. Ngoye ngo wa pukile u tila okuti.** Eshunomonima netalo konima oli na oshiponga, ileni koshigwana sheni shoka aluhe shi ilongekidha oku mu taamba. Ishewe kombinga yeni pethimbo ndika lyehogololo, hogololeni emanguluko nombili. Onawa sho tamu ningi iiholelwa iwanawa mokulonga uuwanawa.

Mokutya **Aluta continua**, natu galikaneni wo Kalunga e tu kwathe eitedhululo nedhimitanapano!

S. V. V. Nambala

Moku shi yelitha tse Aanamibia atuhe otwa koneka wo kutya iilyo yo DTA nosho wo yuungundu umwe inaandi u tumbula, oyo wo ya li iilyo yokabinete mepangelo lya SA okukolonyeka Aanamibia yakwawo. Ngaashi naanaa Dirk Mugde, Andreas Shipanga, Moses Katjuongwa, Peter Kalangula nooyakwawo.

Omimvo odhindji odha ka pita owala taya li eliko lyaNamibia nokutotapo oompango mokabinete nosho wo dhuuministeli, ashike inaya eta po nandoelunduluko lyasha tali ulike ondjila yemanguluko, onkene ngaa aantu ya kala yaa he na uutheмба wopantu nokuhepekwa nayi. Ihe nena oyo ye li ya kwatela emanguluko komeho nosho wo okuuvanekela oshigwana uwanawa wonakuyiwa yaNamibia

"Kombanda yomaale ihaku zi magadhi." Onkalamwenyo yuuthemba womuntu nosho wo elongo lyaayehe mosikola oto ke li kutha peni, ngele nani ino shi ninga nale sho wa li na SA? Okabinete oka nyengwa nale okweeta po uuthikepamwe, eputudho lyaayehe melongo, nombili nemanguluko lyoshilongo shetu. Oka kala ashike nokuthiminika aantu okuhepeka aakwashigwana momalelo gako ngaashi nakusa Nájoba, ngoka a li ha longekidha omakakunya ga ka hepeke aantu.

Ngame shino otandi shi ekelehi kokule nomadhiladhilo goshigwana shaNamibia, nokukala ndi na einkelo kutya oSWAPO oyo ayike ongundu tayi eta onakuyiwa yaNamibia yi kale yi thike pamwe. Onda hala wo oku shi yelitha mo nawa kutya, omatilitho nomambandameko naga mone ehulilo. Mudge okwa li a ningi aniwa eindilo, opo aalongi kumwe naanasikola yaa ha kale we aniwa miinima yopapolotika. Oshinima sha tya ngeyi oshi li ombepo ombwinayi yongundu yo DTA.

Kaku na nando omuntu ta ka kala a taamba e-dhiladhilo lyoludhi nduka. Aalongi nosho aalondhwaoye li aantu nosho wo oye li aakolonyekwi ya SA.

Omulongi nenge omulongwa oku na wo uuthemba wi ihwapo oku ka hogolola ongundu ndjoka ye a hala noyi li kuye tayi ke mu etela emanguluko, oyo a ze miikaha yondeeveli SA. Ngele andola okukala kokule miinima yopapolotika, ope na mbela ondunge yontumba tayi ka kala mehogolola yaa he shi yopapolotika? Omuntu ngele ota ka hogolola ongundu yopapolotika, nena oku na uuthemba we li hwapo okukala a manguluka miinima ayihe yopapolotika. Pwaa na opolotika kape na emanguluko.

Natu tale wo ishewe komalandwambongo ga SA, ngoka ga shanga owala uukalata womahogolola wa puka, nelalakano okushunitha emanguluko lyetu monima. Yakwetu iimaliwa nayi tu zeni momemo, tse tu kutheni oshigwana shetu muupika woombulu dha SA dhokatongotongo. Otashi ku kwatha shike okukengelela oshigwana shoye?

Inamu landitha po we oshigwana sheni. Taleni kaamwahe yaJosef okwa li ye mu landithapo, konima oye a ka ninga hekulu. Taleni Judas okwa landitha po Jesus niisilveli, nokonima okwe ki imangeleka niimaliwa ye ine yi lya we. Natu dhimbulukweni omuyamba ngwiyaka, okwa li ti ipopile sho e na ayihe yokombanda yevi nokwa li e wete ota vulu ihe okulya, okunwa nokuvululuka nokuhanagula iigandhi iikulu notunga iipe, ashike ombaadhilila oku uvu ta lombwelwa, 'egoya ngoye' omwenyo oto gu kuthwa nena."

Martin Kasita
Northern Namibia

Eindilo koshigwana

Otandi indile oshigwana ashike shaNamibia tu galikanene omvula manga kuye. Inatu etha tu ithanwe kOngeleki uuna ku na omagalikano, tameka nena Kalunga okwa tega egalikano lyoye esiku kehe.

A. Shikale
Mittag Hostel
Oranyemund

Oofuto dhimwe dhiyenditho dhaa na uuyuuki

Komumwameme omunyanyangidhi gwoshifo shOmukwetu, ondi na eindilo koshigwana unene kombinga yokOwambo. Onda li nda lili kaamwameme yiihauto yomomudhingoloko gwOwambo. Onda londo iihauto pOluno okufala ndje kegumbo. Onda heluka muumbesa mboka hau longele pokati kOwambo nOvenda pu na ookilometa dhi vule 700, ihe oto futu R30,00 nenge R40,00 omolwiinima.

Ihe aamwameme yiihauto yokOwambo owe mu adha pOluno, e ya kushe shoka e endela, ye ote ku londeke ongula ndjoka. Ye ota ka mana ko ihe ethimbo lye ngaashi ta vulu, ngoye u ka thike megumbo uusiku. Ngele ou na elago oto pulwa u fute R70,00 oshoka aniwa oku ku shi nawa. Ngele ku shiwiki otashi vulika u pulwa R150,00 oshoka aniwa oto zi kUushimba, ye ina tseya iinima mbika u na ngele oyoye nenge owa tumikidhwa.

Aaholike, natu talathaniiko nesimanekathano tse tu kwathathaneni momaudhigu getu. Mbika oyo iinima tayi longo. Tu yalulilathaneni oondjele dha yela nodhopauyuuki. Oshigwana ashike oshi li muudhigu. Ihe ohole nombili otayi tungu.

Ndinelago S. Titus
Windhoek

Sha tsima ko emanguluko

Otwa hala okupandula omusamane Nalimanguluke Mushimone moshipopwiwa sha holokele mO-

mukwetu No 13, tashi popi okatongo hoka taka ti pii moNamibia. Natse wo otwa hala okugwedha po kombinga tuu ndjoka yiilonga yaana yoohashikeshalye moNamibia muka.

Tse yene itatu ti iilonga kayi mo ngaashi hatu mbembelekwa, ihe iilonga omo lela yi li. Kuume Nalimanguluke natse wo otwa lila ngangoye, aakomeho yiilonga oya lilitha, unene tuu aataleliskola osho wo ookomitiye yooskola haa tala owala omazimo gawo noyana. Iihuna shili.

Untag, omolwashike e ya ta igidha tu ninge omaindilo giilonga, ihe sigo namutenya nguka ine tu yamukula? Onkee tuu ta yi momukalo gwokatongo. Oku li ta longo pamwe naamboka haa longo miipangelo, Ondangwa nosho wo naaniilonga yalwe. Pomahala gawo ngono ya zi ohapu longo oolye ano?

Ano oshike iilonga yomoNamibia hayi langekwa ashike mbono haa longo nale? Nena omuntu ota longo osikola, ongula moshipangelo, hela okOndangwa, nena omoUntag? Oye ayeke? Omuntu ha longo ta hogolola shi a hala a longe, yakwawo yaa na iilonga. Naashika otashi tu etele omaipulo oge-dji ngaashi taga landula:-

Ano oonzapo dhawo odha yooloka kodhetu ngiini?

Oyo ayeke ando yi ilongithwa kiimaliwa yaakuluntu yawo mosikola?

Ano osha zi peni iilonga yongashingeyi yi kale ashike yaantu mba ya walwa komakenge? Yaana yaathigona oyi li peni ano?

Onawa aakomeho mu tale wo naana yoohepele

Nane aakomeho omwa zimina tuu shili tu kale noonzapo tadhi hepa? Otwa lila shili, onawa mu shi tale nuuyuuki ne mu lundulule okatongo keni. Omuntu owa li to ilongo nelalakano, opo u ka kwathe aakuluntu yoye mboka ya kala taa ku ihepekele manga u li moskola, ihe nani iilonga oyoohashikeshalye.

Ano aakomeho yiilonga oshinima shono ohamu shi tula tuu momitumba? Tu kwatheni iilonga yaa ninge yomazimo noyomakenge, ihe yi kutwe panzapo shaashi kehe gumwe okwiilonga nelalakano okukwatha oshigwana. Tamu tu londekitha oombinzi komaipulo.

Taaliko naMuyemateka
Oshakati


Oshigambo High School

(Private School of Evangelical Lutheran Church in Namibia)
invites applications from teachers with University Degrees
+ Teaching Diplomas

1. AGRICULTURAL SCIENCE
2. BIOLOGY
3. ENGLISH
4. HISTORY
5. PHYSICAL SCIENCE/MATHS

Accommodation available;
Closing date 15 November 1989

Apply to Principal, P/B 2026,
Ondangwa 9000
Tel. Ondangwa 1202



Omukuluntusikola

17 ya mangukulwa mo

Osha leshwa momapandja goshifonkundana The Namibian (21.9.1989) nokutya mboka ya kala aakwita yoPlan moSWAPO 17 noya kala ya dhigininwa ku SA oya mangukulwa 18.9.1989. Osha ningilwa pOfaalama Mannheim, popepi naTsumeb.

Okuza metatamumvo nuumvo, opwa kundanenwe epangelo lya SA lya dhiginina iliyoyoSWAPO 75, mbyoka ya kwatelwa momalugodhi omimvo dha zi ko. Mekonakono lyethimbo ele, oshinima shoka, Oraata yOongeleki muNamibia (CCN) oyi itu mofaalama, ndjoka pakudhimbululwa, ya kala melongitho lyoKoevoet, nkene mwa dhigininwa iliyoyoSWAPO. Ndjayi Hans Dreyer, omuwiliki gwoKoevoet, naye omo a adhikwa.

Oonakumangukulwa oyu ulika omakankameno gawo, kutya yo otaa landula natango SWAPO mekondjo lye, sigo opuuketha wehogololo. Ayehe 17 otaku tiwa oya adhika yi inyolitha manga ye li mofaalama ndjoka.

Omakotokelo gomehogololo

Aawilikingeleki 10 yomillongo: South Africa; Zambia Zimbabwe; Kenya; Tanzania; Namibia; Malawi; Lesotho; Swaziland naBotswana oyi indila ligwanahangano (UN) yi hulithe po omakotokelo melongekidho lyehogololo lyaNamibia. Mokunyeneta omukalo gwa SA oye e ethelwa ewiliko lyehogololo, aawilikingeleki oyi indile omukalelipo gwo UN, muNamibia omusamane M. Ahtisaari a tale nkene omakotokelo nomahindo kilyo yoSWAPO tayi hulithwa po.

\$ 165 000 ku SWAPO

Oraata yOongeleki muuyuni (WCC) otayi gandja kEhangano lyaSWAPO ilimaliwa yo-shiamerika \$ 165 000 opo ehanganho li tsakamithe ilonga yalyo okumangukululitha Namibia. "Osho tu yelela, kutya SWAPO oku li etegameno lyAanamibia, onke tatu mu yambidhidha, osho aagandji ya gandja omatompelo gokukwatha.

Mbaka ya kala mondholongo oye li tuu peni?

RUFUS AMUKUHU (44) Nakayale 18.9.1978
SIMEON AMWIIMBI (75), Onankali 12.1987
ERASTUS NDEIFEKA (48) Nakayale 18.9.1978
FESTUS ADOLF, Kongo 9.7.1988
FESTUS SAMUEL, Kongo 2.1988
MIKKA GEORGE, Windhoek 26.10.1988
PAULUS HAFENI (20) Onanghwe 16.12.1980

HAFENI SH. PAULUS, OHAUKILO 15.12.1980
FRANS KASHIPALEKWA, OHAUKILO 15.12.1980

NATANAEL NGHINAMWAAMI ?? ??
(N) JASON IILEKA (15) Tshandi 14.7.1988

MUTUMBULWA AMUKUHU (38) Nakayale 9.1978
FESTUS NAKAWA (56) Ontananga 10.1978
JOHN NAKAWA (50) Oniipa 31.5.1979
DAVID HAMUTETA, Okatana 13.10.1979
VILHO MATEUS NYAMBALI ?? 25.7.1980
MARCELLINUS IIPINGE (35) Okatana 4.10.1980
MODESTUS IIPINGE (30) Okatana 4.10.1980
ANDREAS KASHIKOLA, Elombe 27.11.1980
TOIVO SHILONGO, OKAHAO 5.5.1980

MATIAS ASHIPEMBE, OSHIGAMBO 7.6.1979
PETRUS EMVULA ?? 10.7.1988
JOHANNA KAYAMBU ENGELA 31.7.1987
TEOFILUS MATEUS, Elombe 27.11.1980
FILEMON KASITA IIKELA (43), Oniipa 19.1.1981
KRISTOF IYAMBO SHIKONGO Ekamba 10.4.1981
SIMEON JOHANNES NEHOYA (40) Onyaanya 6.1981
AMUTENYA JOHANNES ASHIPALA Okatana 29.6.1981
MARKUS PAULUS, Oniipa 4.9.1985
RUBEN EDMUND, Eendobe 28.11.1986
ABNER SHIKESHO, Oniimwandi 3.7.1987
AFUNDE NGHIYOLWA, Oshikuku 4.9.1987

RUDOLF BAHM

Omupangeli gwootundi MOSHAKATI

Mpaka otandi tseyithile aayakulwa yetu ayehe, kutya iilonga yokupangela ootundi, okulanditha po oompe nokwoopaleka ndhoka dha teka, okutula ko omakende nuumanya, itatu yi longele we metungo JAMAICA INN.

Ngashingeyi otu li mpaka mOshakati metungo lya ENOK (BBK), mpeya hapa kala pwa thikama aluhe omaloli goeskilima (Roomys). Shika otashi ti elalakano mpaku oku ku c'ela eyakulo ndika popepilela, waaha pumbwe we okufala nenge okutuma ootundi dhoye kUushimba.

Ohatu landitha wo ootundi oonkulu kondando yi li hwepo, onkene tu talela po ngele to piti pOshakati.

Eso

Momukunda Oshushe megongalo Okaku, omwa zi onkundana yeso lyomukulupe Aina Mpingana Angula, okwa mana oondjenda dhe 1. 7. 1989. Okwa thigi ko oyana yatano naatekulu oyendji. Omusamane gwe okwa manene oondjenda dhe 8. 11. 1960. Amuhe mboka mwe fu popitha nohapu yaKalunga, Kalunga ne mu gwedheleko, tsikileni neyakulo lyeni Omuwa ote mu futu.

Omahekeleko, Aafil. 1: 22 - 23

Hilma Kashani Nikodemus
Okaku

+++++

E TU TETEKELE

Omasiku sho ga li 31. 7. 1989 Tate Kalunga okwa zimbula omwana, kuku Johannes yaFrans muuwehame wethimbo ele, megongalo Uukwiyuushona mOndonga. Okwa thigi ko omuselekadhi gwe, oyana yaheyali naatekulu oyendji. Otatu pandula ookuume naashiinda amuhe mboka mwe tu hekeleke noondjimbo noshu wo nomagalikano. Eps. 23. Eimbilo 400.

Peha lyaatekulu
Vistorina Ndahambeleta Iiyambo

NAMIBIA NAAKALIMO YALYO

Shigwana shaNamibia, Namibia olyo evi lyaNamibia. Shigwana onawa ngele to tula uukuni kumwe Namibia li mangukuke. Shigwana aanona oya vulwa, uupika waBotha naShipanga. Oondhila nomiti niinamwenyo nayo oya vulwa wo.

Emanguluko lyaNamibia oli li popepi. Onawa ngele tatu tula Namibia momagalikano. Ondjila nande nayi kale ondulu, Namibia oli na okumanguluka. Shigwana longa wa mana mo uwanawa okomongula.

Oomeme nootate, aamati, naakadhona, aagundjuka naanona Namibia olyaAaNamibia. Natu longeni twa manamo, opo tu moneni emanguluko.

A.K. Amukugo
Education Secretary
Walvisbay

OMUKWETU

Oye oshifo shOongeleki Onkwaevangeli paLuther yomu SWA/NAMIBIA.

Ohashi nyanyangidhwa mOshinyanyangidho shOongeleki mOniipa.

Omukuluntu gwoshifo omumbisofi Kleopas Dumeni.

Amushanga gwoshifo omusita Sebulon Ekandjo.

Ondando yOmukwetu muNamibia naSouth Africa R5,00 komumvo.

Pondje yaNamibia na SA R20,00 komumvo. Ndjika oyo wo ondando yoshifo shomondhila .

Oondando nomambesitelo agehe naga tumwe kOmukwetu, Oniipa, P/Bag 2013, Ondangwa 9000, N A M I B I A.

ELOC PRINTING PRESS
PRIVATE BAG 2013, TEL. (06762) 11, TELEX 56-3257 WK
SWA/NAMIBIA